



聖宋名賢五百家播芳大全文粹卷百三十一

上梁文

新居上梁文

辛幼安

百萬買宅千萬買鄰人生孰若安居之樂一年種穀  
十年種木君子常有靜退之心久矣倦遊茲焉卜築  
稼軒居士生長西北仕宦東南頃到郎星繼聯卿月  
兩分帥閫三駕使輶不特風霜之手欲龜亦恐名利  
之髮將鶴欲得置錐之地遂營環堵之宮雖在城邑



闌闌之中獨出車馬囂座塵之外青山屋上右木千  
章白水田頭新荷十頃亦將東阡西陌混漁樵以交  
歡稚子佳人共團樂而一笑夢寐少年之鞍馬沉酣  
古人之詩書雖云富貴逼人自覺林泉邀我望物外  
逍遙之趣吾亦愛吾廬語人間奔競之流卿自用卿  
法如扶脩棟庸慶拋梁

拋梁東坐看朝暉万丈紅直使便為江海客也應憂  
國願年豐

拋梁西方里江湖路欲迷家本秦人真將種不妨賣  
劍買鋤犁

拋梁南小山排闥送晴嵐逸林鳥鵲安枝後一枕薰  
風睡正酣

拋梁北京路塵昏斷消息人生直合在長沙欲擊單  
于老无力

拋梁上虎豹九關名莫向且須天女散人花時至維  
摩小方丈

拋梁下雞酒何時入鄰舍只今居士有新巢要輯軒  
窻看多稼

伏願上梁之後早收塵迹自樂餘年鬼神呵禁不祥  
伏臘倍承日給坐多佳客日悅芳樽

花信亭上梁文

洪景伯

厯載買山方策勲於此日羣芳得地有報喜之祥風  
乃作新亭用酌勝槩盤洲老人酷好行樂雅知倦遊  
治盤洲百畝之園貴中戶十家之產物非容易而盡

獲事或艱難而晚成東閣西樓僅有一牛鳴之隔左  
花右竹幾乎兩端角之爭弗芥蒂於胃中若羈縻於  
化外灰心久矣唾手得之胡越為一家无尔界此疆  
之異雲夢吞九澤合遠山近水之竒草木皆知燕雀  
相賀畫棟侈丹青之飾雕欄呈紅紫之妍四時携酒  
則親朋足以娛嬉千里命駕則故舊斯焉歎曲野無  
青草擁春徑之名葩菊有黃華送秋林之清馥閱冬  
舊夏敷之相繼任朝榮暮落之自然已架虹梁須吟

繭紙

東日日來占花徑風長把芬香迎杖屨不將消息倩  
鱗鴻

西丹桂盈林菊滿畦霜可拒時花恨老憂能忘處草  
慚低

南芍藥留春不脫驂夾岬芙蓉爭濯錦雙頭倒影媚  
澄潭

北鷗思從容魚足食梅花滿眼雪花飄玉骨冰肌同

一色

上東盼雙溪西楚望稍疎問訊竹平安貪看穿花蝶  
來往

下蘭蕙叢卑宜在野閑披花史傍欄干我欲雌黃賡  
演雅

伏願上梁之後風光益好樂事不衰三百六旬而歲  
成常常乘興二十四番之花信一一飄香凡我同盟  
逢場作戲

容膝齋上梁文

洪景伯

寸地休心或發置錐之誚數椽容膝大勝環渚之居  
非坐井以觀天猶乘槎而問漢家桶但求於細木門  
闌不納於高車斤斧論功龜魚薦瑞盤洲老人技窮  
知止興盡倦飛半百年而日苦無多又踰十稔九萬  
里而風斯在下安敢肆言鷓鴣不過於一枝鳳凰始  
翔於伾因山之麓倚竹為廬每駐屐而少留必橫琴  
而獨樂塵外欲招於五老飲中難著於八仙抵掌而

談不出柳州之景曲肱而枕可尋蟻蛭之游晝掩卷  
以盟鷗夜舉杯而勸月小以成小斯焉取斯霧塞華  
棖沈沈者所以敗也風生圭竇綽綽然有餘裕哉雖  
不上梁何妨下筆

齋之東九曲雙溪在眼中人世最難開口笑興來寧  
惜酒樽空

齋之西矮桃得地漸成蹊游鯤自逐天池樂此處相  
忘尺澤鯢

齋之南斗大生涯亦可貪仙島有名身不到个中真  
趣上登三

齋之北坐看蠻觸干戈息度地休吟葛屨詩開疆盡  
掃槐安國

齋之上芥納須彌休說妄淺聞狹見小丈夫豈識汪  
汪千頃量

齋之下何必萬間謀廣廈南窓翹足傲孤松北垞轉  
頭无片瓦

伏願落成之後四時長健一室易安危坐蒲團烏有  
髀消之患緩行草徑更無股栗之憂凡今之人與我  
共此

聚螢齋上梁文

洪景伯

三葉决科更編花萼之集一經趾美當慕桂芳之詩  
月兔未明風螢可聚授諸梓匠建此山房盤洲老人  
世禪儒宗名標藝苑演輪熬禁仍父子者四人結綬  
鵷行踵兄弟於二府兒輩久聞於師說孫枝半離於

童蒙欲增門戶之輝當佩輪輿之戒念熬膏而繼晷  
尚鑿壁以偷光肄業能勤策勲可必張口如吐雲霧  
雖懷綑簪笏以徒然聽履而上星辰盡燈火簡編之  
所致莫惜數年之苦學誓圖千佛之榮名良弓之子  
必為箕存心相續彊弩之末不穿縞勉力有終茲頌  
雙枝試聽六詠

東一生窮達卜童蒙拚却數年稽古力拾青拖紫笑  
談中

西景到桑榆謾噬臍起取光輝對黃卷任他簷外玉  
繩低

南燒燭尋書過草菴月練縈窓如白晝牙籤插架好  
窮探

北更漏迢迢天又黑短檠參用也无嫌莫使凝塵弃  
墻側

上万點飛星迷四望案頭乾頭死可憐渠人倦欲眠  
渠亦放



下可代膏頭顛午夜清霜十月嘆飄零便有雪花相  
假借

伏願上梁之後筆耕不輟書癖休醫詩禮承家長作  
蟾宮之想朝昏挾策无貽螢燭之羞傳之雲仍味我  
藥石

楚望樓上梁文

洪景伯

江漢分楚望昔聞騷客之辭西北有高樓茲占蠓州  
之景工師喜於得木龜筮未嘗違人繩墨既陳鑿枘

相合盤洲老人六年治圃三徑來蹊桃塢梨原雜百  
花而競秀溪堂水閣湧雙派以交流戲魚識鳴屐之  
聲馴鶴顧隨軒之步復營飛觀以俯西郊慕元龍百  
尺之名哦孫楚五尋之賦變梯雲之新級如履坦途  
試耿雪之曲欄已橫踈影縱目而天光无際怡顏而  
日力有餘邱壑足以起予草木誰不知我旁瞻廬阜  
納爽氣於閭楹前對鄱江發長謳於楫櫂將以登臨  
之暇時乎酬唱之娛從他燈火下歌臺且向園林窮

勝事舞低楊柳月久灰年少之心棲老鳳凰枝獨給  
歲寒之友修梁升也短韻來歎

東雉堞連延紫極宮漁子入關爭蚤市鱸人擊水快  
清風

西天際羌廬八望低花萼樓臺才五尺瘦筇來徃印  
長堤

南萬頃風煙性所耽細草茵重春亘野澄江橫練月  
窺潭

北美竹如椽瀟洒國巢雲上下啓輕窓一覽芝山盈  
秀色

上落霞飛鷺供清賞一聲長笛倚欄時待得蟾光縈  
蕙帳

下剩作茅廬容櫪馬藕花開後羽觴頻風掩郊扉回  
俗駕

伏願上梁之後日涉而風雨不渝雲臥而神仙可學  
筍菹魚醢進野老之晨羞羽衣虹裳邀江妃而夜語

其誰歌馬同我盟鷗俛仰之間詠歌不足

小樓上梁文

葛謙白

考成版屋何慙南嶽先生未辨石樓終愧香山居士  
歸愚老人上韓愈宜春之印歸肩吾雪水之蘆芟薙  
北隅經營後圃將使樾蔭几席花艷壺觴雖无佛國  
之優曇尚欠仙家之旌節然鉢孟傳杜鵑之種羯鼓  
開繁杏之柯牡丹送婺女之星芍藥醉楚狂之子漁  
郎漾舟於桃花之側孺人憂瑟於辛夷之前亦足以

暢叙幽情淹留歡緒爰興層屋下視綺爰原裊裊露  
梢蒸綵霞而拂檻重重煙葉屋翠屋以承椽有是賞  
心何辭屬役既謀龜筮用舉虹梁

東曲港飛橋一葦通鹿苑寺前魚酒市趁虛時有杖  
藜翁

西倒影千峰落畫溪一望滄浪芳薄裏幾番驪裏綠  
楊枝

南鐵鳳華鯨響淨藍飛錫何方來白足為人時演後

三三

北蒼下峩峩生翠滴山人莫遣曉猿驚驛路須防德  
璋勒

上醺幄翻空薇作帳凭欄細細翫花梢要看春工雕  
刻相

下閑裏光陰買無價蒼苔秀地長鋤痕智井汲泉生  
石罅

伏願上梁之後享衛武之百年朋魯僖之三壽一百

九十策榮及孫曾三萬六千觴醉同賓友絲茲福筭  
波及里閭

獨善堂上梁文

熊子復

葺汾曲之廬首奉丹青之像襲茂陵之藁高參金石  
之藏祠堂用昭千赤堤書閣更憑於翠隴恭惟先君  
獨善居士誠存省己孝篤慕親遠求百世之師近取  
一鄉之友錦囊收拾擷詩人之芳腴瓊簡發揮探道  
家之秘妙蓋隱以求其志彼用相志而窮則善其身

此宜自號纔躋下壽殊鬱長才藐茲小子之惛痛我  
先人之逝積有餘慶方啓世科潛發幽光尚資野錄  
載營弊墜肇舉脩梁屋茅捲去三層夙已聞於徹故  
井泉掘通九仞嗣將見於取新採建溪稚子之謠彰  
宋野遺民之迹

先君亦號  
宋野遺民

東鵲巢山翠倚春空誰過仲舒塋下馬賢良百載有

高風

先祖賢良  
墓在其東

西百尺潭中曉霧迷僊槎有客乘將去遡紫凌青路

較低

南採藥仙童記二三丹成只在元遊處昨夜靈光現  
翠嵐

北武夷九曲僊人宅慢亭燕罷拏舟來好傳天上真  
消息

上小築臨清元大壯星躔不但少微明曾占日暈中  
興象

下十里渾元高浪駕有時風動錦霞翻一葉中流翁

未怕

雨珠波上躑霞錦浪  
中翻先君詩句也

伏願上梁之後徑存松菊而想昔之樂園收芋粟而  
幸今之豐滄浪清水之濯纓既招孺子竅靄淶山之  
燃竹更伴漁翁挹此間之爽氣接吾父之流風

金山大殿上梁文

孫仲益

萬川東注一島中分長江介吳楚之衝故剝踵梁陳  
之舊肇新蘭若寅奉金僊都統太尉得正法眼藏而  
縣宰官了一大因緣而作佛事眷茲勝地獨有頽基

鐘鼓不鳴龍象皆泣毗耶城大居士已屬當仁妙高  
臺老比丘而為說法指囷分粟除地布金嗣開祇樹  
給孤之園首建釋迦文佛之殿六鰲負出三神山仙  
聖之宮一鷲飛來四大海神龍之會迥起諸天之上  
中嚴兩足之尊仰止仁祠俯伸報地大安國步如北  
海若之難窮永錫帝齡等西方佛之無量爰屬脩梁  
之舉共賡擊壤之音

東岸赤銀河一水通萬疊彤雲竟天起六龍推出半

輪紅

西草舍蕪城望眼迷日脚未收蛻飲海濤頭初上雪  
平堤

南一勺中冷乳水甘殿閣風來鈴自語曼陀花雨落  
氤氳

北北戶星光珠的皦夜鶴休驚蕙帳空古佛同龕有  
彌勒

上堂堂丈六真金相光明五色爛摩尼八部龍天盡

回向

下二士三生本同社庭前枯柏自長春袖裏靈珠光  
不夜

伏願上梁之後四恩擁佑十力護持萬德從衆香之  
鉢而來羣魔分一炬之燈而去三登歲美百順人康  
六合混同城池有金湯之固千齡際會山河書帶礪  
之盟凡在見聞共茲快樂

資聖寺上梁文

孫仲益

肇開勝地化出寶坊大啓重闈同登覺路共惟資聖  
堂圓明大師悟最上乘法現比丘身住舍衛國給孤  
之園坐毗耶城維摩之室佛光續千燈之照天花呈  
五葉之祥鼎代新六代故刹之遺雄視一方叢林之  
冠乃消穀旦爰舉修梁萬德瞻依百神訶護迎白象  
駕擁金盤陀開黃龍闕踞鐵門限月標指上珠現衣  
中穴癡蠅之紙而見日光發醯雞之蒙而睹天大盂  
申善頌用佐歡謠

東一點龕燈照佛紅卧聽木魚呼曉粥悠悠殘夢履  
聲中

西直指靈山路不迷莫作瑤池阿母看全身自拍拂  
齊肩

南待試曹溪一勺甘嶺上加梨拈不起憑師更說後  
三三

北身前身後三生石住世因循五百年兩手摩娑話  
銅狄



上寶蓋空盤蔭龍象堂堂一路總持門煌煌百寶光明藏

下地布黃金光不夜湧出青蓮十丈高不比凡花有開謝

伏願上梁之後三靈丕應千佛光臨泰階調玉燭之和寶厯驗蘿圖之固官寮有九遷之喜士庶迎百順之休應生不住布施之心同證无上菩提之道

醴泉觀三門上梁文

歐陽永叔

我國家膺三靈之眷命革五代之荒屯多壘削平包干戈而偃武四夷面內解辯索以承風逮先聖之撫臨躋羣生於富壽乃欲追羲軒以並軌歎雲亭而勒成容典交修遂舉曠古難行之禮瑞應來第有非人力可致之祥卿雲裔露之光紛紛而雜委朱草靈芝之秀焜燿而叢生爰有神泉湧茲福地甘如飲醴美可蠲疴湛靈液以淵渟敞琳宮而掘起歲時猶豫順民俗之樂康棟宇翼嚴表京師之壯麗近以有司不

謹飛焰延災皇上愛物推仁因民所利顧遺基之歸  
爾回聖慮以惻然爰飭良工載新有作損其土木之  
費所以寬民適以奢儉之中俾之可久用涓吉日構  
此脩梁盍效懽謳形於善祝

東危構岩堯彩露中欲識聖君仁及物靈源一勺本  
无窮

西金碧相輝俯仰迷万瓦寒光浮瑞露層簷晚景掛  
晴蜺

南善利功深不可談但喜斯民无疾病誰知靈液有  
餘甘

北觀者如雲來九陌四方萬國會京師有類衆星環  
斗極

上棟宇規模標大壯落成行即慶良辰望幸何時來  
綵仗

下祈福為民崇廣廈四時和氣致休祥萬國多歡洽  
朝野

伏願上梁之後三辰順軌百穀豐登卉服雕題咸被  
垂衣之化行歌載白永為擊壤之氓

天慶觀法堂上梁文

呂貴克

執祖建國章聖崇真爰詔邇遐各嚴祠宇雖邊徼蠻  
荒之服頒天書金寶之祥名山大川咸介无疆之壽  
皇天后土永隆不拔之基眷我樵城舊崇天慶奉帝  
祖儲休之所乃祥符植福之宮不幸妖烽遂為廢地  
列聖升騰於寥廓九龍潛躍於淵深觀舊名九龍也成

一區瓦礫之荒場晦千里江山之秀氣黃冠羽服立  
心廣募於衆緣富室大家協力共成於盛事神靈不  
昧興復有時殿堂增壯於前規鐘鼓一新於舊觀獨  
翻經之堂未叙而祝堯之地方虛久矣无聞誠哉闕  
典有一居士率上大夫作意經營同誠勸化曾未暮  
年之久俄驚輪奐之新棟宇翬飛椽題山立衆稱盡  
美豈但苟全似仙家官府之雄疑神運鬼功之速載  
涓穀旦用舉脩梁命彼伶倫同伸善頌

東地遠天高仰日宮拱極明星光燦燦繼明兩帝壽  
崇崇

西十里來山出澗溪福地占先誰卜兆地靈興廢豈  
無時

南得道真人聚碧嵐寄語蓬萊方丈客不惟海上有

三山郡南有山號道人二峯

北文字五千談道德華封祝罷效嵩呼不媿金門稱  
羽客

上聖治太平安有象千秋萬歲樂時康祝壽可能忘  
將相

下歲歲秋冬春復夏黃童白叟慶年豐鼓腹謳歌陶  
聖化

伏願上梁之後升堂肅肅祝聖琅琅二帝同歡睿筭  
高深於嶽瀆中原恢復版圖紀載於山川多士以寧  
百僚任職金枝菊菊玉葉離離宗廟威靈保邦家於  
永固祖宗德澤惠民社於無窮

玉僊堂上梁文

熊子復

天開大府六龍升代邸之潛地作高堂雙鶴下浮邱  
之馭若時勝境孰會靈蹤玉洞鸞洲岡阻而列其真  
宇金坡鳳掖岳牧而用此詞人知府侍制尚書妙學  
際空雄文振古粃糠盡掃傳家分雲漢之裳蓂鑑獨  
持致位上星辰之履暫來宣於藩化佇入贊於廟廷  
誰風月之誰分諒江山之我助貝宮可俯漾寶額於  
重淵丹竈尚存耀靈光於絕巘肆袞舊跡肇揭新名

燕寢香凝曉開襄陽叔子之閣寒城煙淡晚上武昌  
元規之樓有覺具楹不愆于素翬騫畫棟回江淹碧  
草之春虹引雕梁散張湛紫雲之雨宜形頌歎以壯  
經營

東舊尹重來千騎雄鳳苑靈芽抽曉露鶴峯王氣靄  
晴空

西雲合秋空映彩霓神蓱飄來洞靈宇僊花泛出武  
夷溪

南煙外孤鸞有客驂梅灶仙傳丹鼎液芝峯帝屯紫  
泥函

北漢闕詔歸前夜席窓扃雲霧拱皇居履曳星辰環  
帝極

上寥廓太虛含萬象揮斧輕裁寶月團乘槎穩泛銀  
河浪

下庭轉裳陰日多暇山襟水束望重城風震雨凌依  
廣廈

伏願上梁之後甘棠教美華黍時豐乘蓬萊之清風  
游雅懷於塵外依美藻之淥水聚秀竅於幕中兵絕  
弄而潢池既息刑弗犯而囹圄斯空早旋歸於政府  
永輔贊於法宮

夫子廟上梁文

石守道

日月不盛大星辰不衆多無以昭天之明山岳不磅  
礪江海不橫瀉無以彰地之載制度不恢廓宮室不  
北麗無以示聖人之尊天明不昭衆庶何所仰也地

載不厚萬物何所附也聖人不尊羣儒何所法也况  
藝祖始興之地先皇親狩之都鼎峙為京自四畿相  
附而先聖廟齷齪僻陋不堪其憂何以壯遠人之望  
視四方之則哉留守尚書公下車月餘政未及施首  
嚴聖祠豪人承風偃化相率出錢二百萬購材於河  
陽咸得大木以新厥居輪焉奐焉京邑翼翼宋人開  
聾發瞽知聖師之尊且大廟作凡三月而成功有司  
告十二月二日吉請上梁焉公命盛食以落之

拋梁東夫子之道岱岳並崇西夫子之道太華與齊  
南夫子之道衡岳相參北夫子之道常山北極上夫  
子之道如天可仰下夫子之道如地不瀉  
伏願上梁之後留守尚書公入持國鈞正位台席行  
聖師之道上以致君於堯舜之上下以躋民於仁壽  
之域萬斯年兮主聖臣直

北嶽景貺門上梁文

程子山

山尊常嶽府秘蘭臺光分畢昂之精肇建神明之宅

配天作鎮盤三千里之宏基與地儲靈產十九種之  
神草有嚴闕宇夙奉晬容四時之牲幣交修一方之  
耳目咸仰歲月滋久梁棟弗修方妙道之助興當真  
人之在御載新寶構大闡琳宮益彰帝所之尊用侈  
民心之報恭惟皇帝陛下懋建皇極允執道樞諸効  
祥衆珍來集九功惟叙百穀用成茂對天休恩荅神  
祐乃眷明靈之嘉德增崇館御之宏規鎮朔之殿旣  
嚴景贖之門有闕丹輿綠輦駐真馭之翱翔碧瓦朱

甍儼帝居之縹緲克舉脩梁之吉日敢伸善頌之歡  
謠

東禮樂車書萬里同政出青陽明杲日仁漸滄海作  
和風

西蔥嶺來王路不迷四海一家無事日聖人萬壽與  
天齊

南璧門金闕斗相參山同天保詩人詠星入清秋太

史占



北嶽靈鎮地扶天德五兵不試靜胡塵玉帛年年朝  
萬國

上千楹寶構嚴神像來游來燕福無疆屹立臯門昭  
景貺

下瓊輪羽蓋神來舍千秋萬歲君王壽九功八政安  
華夏

伏願上梁之後宸心悅豫寶歷綿長帝業等河山之  
固皇明垂日月之光天瑞申錫邦基永昌九譯夷情

之悅四方民俗之康賴一人之有慶保萬壽之無疆

溪東祠宮上梁文

黃泰之

築室于道雖艱其成有功于民式嚴厥祀矧此山川  
之勝實惟香火之憑風雨百年寢隳其固里閭萬口  
易舊而新人不告勞神亦陰助修梁載舉善頌攸陳  
東東倚崇崗氣象雄社社雞豚迎歲事村村花柳足  
春風

西無限青山遠碧溪流水迢迢環玉帶橫橋隱隱接

雲梯

南排闥羣峰擁翠嵐出相佇符巖召望祝君長與老人參

北北嶺嵯峨陵斗極何處推來重疊山祇應鎮鎖英靈宅

上漠漠祥煙迷四望天開符讖應來人指規模今益壯

下一派清漪入圖畫兩度重看虎榜來十年又是龍

頭跨

伏願上梁之後神靈安止民物熙然里無吠犬之防道之喘牛之問文風益茂盛事鼎來導景貺於無窮指榮封之有

龍溪橋上梁文

黃泰之

天不斲材橋斯重建人方病涉事可辭難雖旁觀爭袖手之時亦投機不容髮之會既鄉民攻於不日而斤匠運以成風宜指搗叱宅而一新雄偉之功俾艱

難嶮巖者均獲坦夷之樂上梁協力拍手同歌  
東東望羊峰氣象雄已覩瑞光浮曉日會看新與駕

東風

西幾曲清溪映綠霓拭日渾疑朝雨足捲簾更看暮

山低

南崇壽峯高碧落參望極瞻星長祝笑披風憇暑為

停驂

北北嶺嵯峨陵斗極梢雲長幹幹天機蔽日清陰分

野色

上厯厯羣山環四望夜喚騷人漱月杯春邀野客尋

芳杖

下一帶縈迂八圖畫當年何必濟乘輿異日長看乘

駟馬

伏願上梁之後懋無於有易塞而通峙宏基於不朽  
緜巨濟於無窮載績厥功猶是百年之父老坐蒙其  
利更裕幾代之兒童既山川之改觀宜福祿之來同

巨艦上梁文

崔正言

竊以江右西連荆楚左涉勾吳萬壑喧豨聲搖厚地  
三江瀕洞勢蹴遙天浩乎雲水之鄉必也舟航之利  
某官英姿肅毅茂識疏通大振紀綱笑談自若力摧  
姦惡智略有餘乃鳩集於良工仍選掄於名木萬指  
敏於風雨兩艦屹若邱山下此吉辰謀升巨棟兒郎  
醉飽已慰其勤勞士女謹呼願聞於歌頌  
東巨艦如山浩淼中寄語不須紅錦纜記書新用紫

泥封

西向道江南踏浪兒不用吳音相調笑史君能製權  
歌詩

南揖仙橋下水接藍怖殺鼃鼃與龜鼈紅舩百丈照  
清潭

北他日王孫朝上國龍翁願借一帆風飛過西江如  
電射

上莫放蛟龍掀翠浪要須置酒坐船頭下看江練如

平掌

下看取一川青罷亞兒即醉着不須憂今年米熟無  
高價

伏願上梁之後某官聲名益峻壽祿加隆綵衣日戲  
於庭闈紫綬入翔於近列從容千里草知水國之遙  
安穩一帆不覺長安之遠

聖宋名賢五百家播芳大全文粹卷百三十三終

聖宋名賢五百家播芳大全文粹卷百三十四

祭文

祭司馬溫公

蘇子瞻

元豐之末天步艱維社稷之衛中外所屬惟是一老  
屏于一人名高當世行滿天下措國於太山之安下  
令於流水之源歲月未見綱紀畧定天若相之又復  
奪之殄瘁之表古今所共知之者神考用之者聖母  
馴致其道太平可期長為宗臣以表後世徃奠其墓

庶知予懷

祭司馬溫公

蘇子瞻

左僕射贈太師溫公之靈嗚呼百世一人千載一時  
惟時與人鮮偶常竒公事仁宗百未一施獨發大議  
唯天我知厚陵之初先事而規帝欲得民一尊无私  
母子之間莫如孝慈人所難言我則易之神宗知公  
敬如著龜專談仁義輔以書詩枉尺直尋覬公少卑  
公曰天子舜禹之姿我若言利非天誰欺退居于洛

四海是儀化及豚魚名聞乳兒二聖見公曰子得師  
付以衡石惟公所為公亦何為視民所宜有莠則鋤  
有疾則醫問疾所生師老兵疲和戎上策決用無疑  
此計一定太平可基譬如農夫既闢既蓄投種未粒  
矧穫而炊賓客滿門公以疾辭不見十日入哭其惟  
天為雨泣路人垂淚畫像于家飲食必祠矧我衆僚  
左右疇咨共載一身喪其楫維終天之訣寧復來思  
歌此奠章以侑一卮

祭韓忠獻魏公文

司馬君實

惟公仁義忠厚得之自然所施所履命世之賢冠登  
甲科聲名四傳聯輝冊府表躐英躔徊翔諫署風節  
孤騫擢升法從壯觀近班賊昊叛命西領中樞經畫  
應禦勤勞有年戎醜來庭延登樞府道德之俊同時  
入輔窒姦塞邪剗弊除蠹謗言陰搖分符以去中山  
大齒太行東西連開戎府彈壓羗夷天聲万里雷動  
神馳帝思勲舊召還廟堂帷幄論道海寓樂康仁廟

晚年少陽虛位天下大本未有所繫公常深念圖建  
冢嗣引古盡言山岳其意忘身忘家無所顧避聖心  
感悟遂定大計合天符人英廟主器夷夏歡呼聲震  
天地千艱萬險公若平易六龍飛天帖無一事俄膺  
顧命今上嗣政永厚復土力辭大柄得殿本邦均休  
遂性未離闕庭西陲微擾天子詔公改帥咸錫義不  
辭難受命戒道事寧求還復守鄉閭至始閱月又遷  
魏都時議者建青苗之令出錢取息始惠終病抗疏

論列辭嚴義正夫子動容賢路交慶四見炎涼復臨  
安陽燦燦錦衣煌煌綉裳願上印綬十拜封章宸眷  
深厚未頒俞旨遽嘆逝川莫伸素志嗚呼哀哉自公  
之薨城邑田里老壯童幼咨嗟涕泗非德感人孰能  
如是位居將相殆將二紀萬鍾之祿隨得隨施姻親  
僑客賴公以濟蓋棺之日所餘無幾清白之風照耀  
來世某之椎愚少有倫比久忝賓從納顧特異朝教  
暮誨意均子弟粗有成立皆公之賜撫膺長號肝鬲

將毀奠以叙哀痛无窮已英靈不昧敢奠歆此

祭范文正公

王介甫

我公一世之師由初迄終名節無疵明肅之盛身危  
志殖瑤華失位又隨以斥治功亟聞尹帝之都閉姦  
興良稚子歌呼赫赫之家萬首俯趨獨繩其私以走  
江湖士爭留公蹈旤不慄有危其辭竭與俱出風俗  
之衰駭正怡邪蹇蹇我初人以疑嗟力行不回慕者  
興起儒先苜苜以節相侈公之在貶愈勇為忠稽前



引右誼不營躬外更三洲施有餘澤如醜河江以灌  
尋尺宿賊自解不以刑加猾盜涵仁終老无邪誦藝  
弦歌慕來千里溝川障澤田桑有喜戎孽獠狂敢齧  
我疆鑄印刻符公屏一方取將於伍后常名顯收士  
至佐維邦之彥聲之所加虜不敢瀕以其餘威走敵  
完鄰昔也始至瘡痍滿道藥之養之內外完好既其  
無為飲酒笑歌百城晏眠吏士委蛇上加曰材以副  
樞密稽首辭讓至于六七遂參宰相釐我典常扶賢

贊傑亂冗除荒官更於朝士變於鄉百治具脩偷墮  
勉彊彼闕不遂歸厠帝側卒屏于外身屯道塞謂宜  
耆老尚有以為神乎孰忍使至於斯蓋公之才猶不  
盡世試肆其經綸孰與計自公之貴廐庫逾空夷  
其辭色傲訐以容化于婦妾不靡珠玉翼翼公子樊  
綈惡粟閔死憐窮惟是之奢孤女以嫁男成厥家孰  
埋于深孰鏗乎厚其傳甚詳以法永久碩人今亡邦  
國之憂矧鄙不肖辱公知尤承凶萬里不往而留涕

哭馳辭以贊醒羞

祭呂申公文

程養正

公稟則異得天之粹邁茲昌辰出為嘉瑞生而富貴處之無累幼而聰明克之能至學既知真仕則為道出入屢更險夷一操二聖臨御人望是從起藩入輔命相冊公平日視公靜然恂恂國論所斷一言萬鈞謂公無位位為相臣謂公得志志存未伸然公心如權衡所以無間言於率土德如山岳所以致敬心於

人主從容語默之間人孰量其所補胡上天之不弔不一老之慙遺淵水無涯將孰求於攸濟百身莫贖為有識之同悲嗚呼哀哉羸老餘生辱知有素二男論忘執之交不偶无酬知之路但臨穴以伸哀始託文披而露想英靈兮如在鑒丹誠而來顧

祭歐陽文忠公

王介甫

夫事有人力之可致猶不可期况乎天理之冥漠又安可得而推惟公生有聞於當時死有傳於後世苟

能如此足矣而亦又何悲如公器質之深厚智識之高遠而輔學術之精微故形於文章見於議論豪健俊偉怪巧瑰琦其積於中者浩如江河之停蓄其發於外者爛如日星之光輝其清音幽韻淒如飄風急雨之驟至其雄辭宏辨快如輕車駿馬之奔馳世之學者无問乎識與不識而讀其文則其人可知嗚呼自公仕宦四十年上下往返感世路之崎嶇雖屯遭困躓竄斥流離而終不可掩者以其公議之是非既

壑復起遂顯于世果敢之氣剛正之節至晚而不衰方仁宗皇帝臨朝之末年顧念後事謂如公者可寄以社稷之安危及夫發謀決策後容指顧立定大計謂千載而一時功名成就不居而去其出處進退又庶乎英魂靈氣不隨異物腐敗而長在乎箕山之側與潁水之湄然天下之无賢不肖且猶為涕泣而歔歔而况朝士大夫平昔遊從又予心之所嚮慕而瞻依嗚呼盛衰興廢之理自古如此而臨風想望不能

忘情者念公之不可復見而其誰與歸

祭歐陽文忠公

曾子固

惟公學為儒宗材不世出文章逸發醇深炳蔚躰痛  
韓馬思兼莊屈垂光簡編焯若星日絕去刀尺渾然  
天質詞窮登盡含意未卒讀者心醒開蒙愈疾當代  
一人顧無儔匹諫垣抗議氣震回適鼓行無前跋躑  
非恤世仍難勝孤堅竟窒紫微玉堂獨當大筆五典  
三謨生明藏室頓挫彌厲誠純志一斟酌損益論思

得失經躰慮萌沃心造膝帝曰汝賢引登輔弼公在  
廟堂尊明道術清淨簡易仁民愛物斂不煩苛令无  
迫猝棲置木索里安户逸櫝斂兵革天清地謐日進  
昌言從容密勿開建國本情忠力悉如未之歲龍駕  
颺歛再拯大艱垂紳秉笏乾坤正位上下有秩功被  
社稷等夷召畢公在廟堂總持紀律一用公直兩忘  
猜昵不挾朋比不虞訕嫉獨立不回其剛仡仡愛養  
人材獎成誘掖甄拔寒素振興滯屈以為己德无有

廢弗惟公平生豈弟忠實外內洞徹初終若一年始  
六十懇辭冕黻連章累歲乃俞所乞於意邱樊脫遺  
羈馱沉浸圖史左右琴瑟氣志浩然不陋蓬華意謂  
百齡重休累吉還幹鼎軸贊微計密云胡傾殂慙遺  
則弗聞訃失聲皆淚橫溢卷冥不敏早蒙振拔言由  
公誨行由公率戴德不酬懷情獨鬱西望轎車莫持  
紉紉惟公萃萃德義譔述為後世法終天不沒託詞  
叙心曷能髣髴

祭歐陽文忠公

祭尚德而報功三代以來共之穎故有學而置師弟  
子員講試如法蓋自公始穎之為州尚矣而良士大  
夫生而善其俗歿而祭于學亦莫宜于公惟公翼亮  
三聖出入十年建明大策以康社稷是宜配食清廟  
而弦歌之豈特稱一邦而慰一鄉之思哉師道承命  
為夷有列于學授事之初敬修故事

祭杜祁公文

歐陽永叔

士之進顯於榮祿者莫不欲安享於豐腴公為輔弼  
飲食起居如陋巷之士環堵之儒他人不堪公處愉  
愉士之退老而歸休者所以私自放於閑適公居于  
家心在于國思慮精深言辭感激或達旦不寐或憂  
形于色如在朝廷而有官責嗚呼進不知富貴之為  
樂退不忘天下以為心故行于己者老益篤而信於  
人者久愈深人之愛公寧有厭已壽胡不多八十而  
止自公之喪道路嗟咨况于愚鄙久辱公知繫官在

朝心往神馳送不臨穴哭不望帷銜詞寫恨有涕泗

祭張魏公文代

呂伯恭

鼎分三極中貫至誠扶世違俗經幽緯明北北面龍  
臣鴻弼候臯候夔候旦候奭前授後承皆原於一降  
秦迄唐中間幾息既極乃通是開魏公有遠其傳有  
統其宗匪符匪節匪券而同厥初事親自誠而孝基  
德寢門參騫是蹈肆其事君自誠而忠四朝一心本  
始末終昔在建炎為國馳騫蠹賊內訌將侵天路迺

義其旗馳囊去羽燭彼妖焰萬河並注掃除黃道手  
扶日馭勾陳太微莫不順序始命樞極再命台衡柄  
是文武內拊外征我雨我露我雷我霆煙起蠶屯隨  
指而平區脫之首龜毳之渠威名所加失戈墮車旣  
其無為里忻戶愉羣獻具來翼帝之圖孰柅其成放  
迹江湖已貴不賤已豐不約零陵之居常布所愕披  
剝萬象獨全至樂身外鸞臺夢中麟閣戎馬飲江奪  
公間燕巨轂高幢陪都是殿大人繼明登我元臣爾

袞爾鉞坯冶載新嗔目語難熊羆貔虎聞公之升屯  
歌壘舞野耕肆商秀眉垂髻聞公之升連手嬉遊北  
邊有興禡牙祭纛志之所期欲无遐徼挈輿地圖還  
之清廟炯炯丹衷日月所照帝憫公勞佚以殊廷歆  
騎箕尾上比列星殄瘁之悲萬方同升某頃以孱陋  
遠戍邊城敵情叵測民力弗勝條利畫病狂言屢興  
朝加暮應是獎是稱籌恩權惠邱山猶輕几几赤烏  
庶幾快覩未日德輝已耳凶訃扁舟西還飛旄南去

隻雞升酒莫展情素公視死生猶旦與暮一氣闔關  
新新故故默反造物冒此下土我獨何為淚落彫俎

祭張魏公文

王龜齡

惟公學造明誠才全文武忠孝根於天性節操貫乎  
歲寒社稷之功最高親當取日君父之讐未復誓不  
共天二十年見斥權臣五百載重逢聖生夷狄服汾  
陽威德兒童知司馬姓名意者天必相之嗟乎命何  
止此方渡江而擊楫遽樂聖以銜盃宣室興思蒼生

望起雖曰閉門絕粒不忘憂國愛君中山功未及成  
讒謗之書盈篋武侯死有遺恨英雄之淚滿襟一老  
不遺百身莫贖其濫此假守驚聞訃音忍觀絕筆之  
銘愧阻臨棺之奠嗟吾道之窮已甚非夫人之慟而  
誰

祭范蜀公文

蘇子瞻

仁宗在位四十二年睦而種之有得皆賢既歷三世  
悉為名臣今如晨星存者幾人孰如我公碩大光明



導日而升燦焉長庚死生契濶公獨壽考天實耆之  
以殿諸老二聖嗣位仁義是施公昔所言畧行无遺  
維樂未和公寢不寧樂成而薨公往則瞑凡百君子  
願公无極胡不萬年以重王國責難之忠愛莫助之  
嗟我後來誰復似之吾先君子秉德不耀與公弟足  
一日之少窮達不齊歡則无間先友盡矣我已白髮  
聞公之喪方食哽噎堂堂我公豈其云亡望公凜然  
猶舉我觴

祭文清曾公文代

呂伯恭

嗚呼邈邱壑之韻者身清而命未必厚鴻彛鼎之勛  
者命厚而身未必清判兩塗而分鶩猶參商與渭涇  
著香山之退傳遺簪組而沉冥澹酬風而酢月陶至  
樂於林垆蹇降命之多竒屢哭殤於頽齡若汾陽之  
元老庇九族以咸寧驅總總而掃迹紛角羈而志名  
極二紀之豪華醉世味而未醒盖邑其至清則厚福  
不得而多取居其至厚則清趣不可以力爭惟大人

之所厚合內外而俱亨遠紫索而却蒲輪頽然天放者既壽物外之樂道板輿而奉鳩杖驩然色養者又擅區中之榮等之香山則無慘戚權之汾陽則未嘗滿盈全古人之未全曠千載其難并乘至全而反真夫何憾於泉扃然而墜一世之師表奪四朝之典刑涸洙泗之淵源絕風騷之統盟槩人與墨客胥實涕而失聲眇孤生之孱陋夙受知於門庭輩子姪以拊育迨衰弱之星星歸印綬以盡哀迫科法之見繩傳

壺觴而往酌隨淚河之東傾

祭忠簡趙文公代

維四年冬十有一月哉生明越二日壬戌左奉議即權發衢州某祇事之初敬遣左迪功郎常山尉周擘以卮酒梓餐致祭于故丞相忠簡趙公之靈惟公高風懿躅照映今昔下自管葛所在不數中遭讒逐以卒于死下至行路為公出涕不三十年是非一定中興名相一變而已有來假守敢言尚德南望楸梧去

我百里官箴有常莫克敬告歸心典刑有如卮酒

祭忠簡趙公文代

維五年冬十有一月哉生魄越翼日己巳左奉議郎  
權發遣衢州軍州事借緋劉夙敬遣同僚以卮酒棹  
餐致祭于故丞相忠簡趙公之靈古者愛其所憇  
之棠不忍其憔悴尋斧斤焉諸葛武侯異代名德環  
祠十里蕘夫芸婦望而不去不敢加寸及於无知之  
草木彼豈有德於後之人而感今懷昔慕義无窮如

是耶公道在海內如皦日殆有不約而然矧伊元德  
相我中興有教有化有典有刑赫然朝廷號小元祐  
而埋玉九原墓不以禮有司懼焉鳩工薙土增新葺  
舊亦惟閱月乃克既事乃如獻賢尚德揭大誼以詔  
頽俗古之人誠有不待下車而為之者此則夙奚敢  
率禮之成走吏以告惟公其享之尚饗

祭寶學劉公文代

謹以淨香蔬食茶果之奠敢昭告于近故大檀越官

使寶學侍郎劉公之靈嗚呼我公遽至斯邪自昔大  
賢之生於世或懷寶自珍而不屑於仕或仕而不獲  
盡見於設施皆生民之不幸而遺後世之悲我公云  
亡邦國殄瘁播紳大夫有識之士聞者孰不為墮淚  
哽欬者乎惟公之生負甚厚憑藉之資儒學傳家忠  
孝世濟而天之所賦尤為碩大瑰竒遭時艱難戎服  
驅馳決策行營參畫西師功施社稷天下孰得而知  
謂公當歸論道黃扉以輔中興成億萬齡之鴻基名

高衆忌投杼生疑剖符外補為國藩維而溫陵鎮江  
之政吏畏其威民賴其慈碩後瞻前配公者誰百千  
載猶將播風謠而流詠思也嗚呼我公才任樑楹知  
侔著龜義氣橫六合英聲聞四夷然試已而不獲究  
其所蘊造化之意人又孰得而窺頃就閑而得請持  
從橐而奉祠親庭戲綵棣萼相輝悟槐宮之大夢契  
栢子之妙機澹然忘懷與世娛嬉謂仁賢而必壽公  
宜黃髮而期頤何一疾之不瘳而遽至斯耶某以愚

陋之質出入公門者二紀于茲嗟小識之窳啟譬營  
爨之甚微公獨眷之前挽後推荷獎拂之過情輒顏  
厚而忸怩頃還故園蒲柳衰遲廬仙洲之谷分甘栽  
田博飯而終身糗藜枉手書以見存延以拱辰之招  
提唯先公忠顯之松楸璨璇璣而壁題豈以道相索  
於形骸之外而遂忘其病骨之支離辱盛意之再三  
欲避命以何辭悵從公之未幾忽夜壑之舟移万夫  
莫贖哲人其萎念話言之在耳腸糾結而涕洟豈厭  
塵境之溷濁凌紫清而騎尾箕而與世永違者乎蔬  
殺香薜侑以哀詞唯我公不忘疇昔之好英風爽氣  
傑然而不可沒者猶將鑒之也已乎尚饗

祭樞密劉公文

朱元晦

維淳熙五年歲次戊戌九月辛酉朔二十日庚辰從  
表弟具位某敢以清酌庶羞奠于近故建康留守觀  
文殿學士彭城劉公之靈嗚呼哀哉天胡付公以瑰  
琦俊偉之才而不并假以耆耄耄期壽胡位公以樞

機藩屏之重而不遂卑以彌綸輔贊之權使公名若  
極富貴而无欲實則抱憂歎以終天此中外志義之  
士所以聞公之薨皆失聲以相弔或雖未識公面而  
亦不自知其涕泗之流漣者也嗚呼哀哉惟公生有  
異質早擢巍科退而自葆弗競弗譁屈首受書典學  
于家力充其美外振厥華暨登王朝遂掌絲綸獻納  
綢繆訂謨密勿忤權觸要无所回屈帝眷弗渝試以  
郡紱受鉞于南剿頑踣死婉孌赤子撫靡哀恫禮賢

勸學道和致豐報政三年鄒魯其風帝曰來歸本我  
兵柄曾不幾時咨以大政公奮其庸帝虛以聽張磔  
宏綱塞絕僭令道直身危突不暇黔出臨兩鎮威燁  
恩漸適嬉于堂遽哭于苦恩詔起之有竦其瞻公臥  
弗承帝悉其孝曰究汝哀來覲來教公言益切公守  
不撓再撫于潭亦顯其效乃遷建鄴民病以饑公不  
寢食坐起嗟咨方略旣張惠術四施曾是流殍化為  
充肥帝嘉乃勲加勞進律帝毗方深遽告以疾忠無

隱情諫有遺筆帝驚罷朝悼此良弼烏乎哀哉我以  
孤童來託公家公不鄙我勸導有加公姿鸞鵠我性  
麇麇豈無異同卒莫庇瑕自公進為議論慷慨實始  
期公高明光大公之知我亦晚而最迨其永歸手札  
告戒褒德撫孤古昔所難并以諉我我其敢安把書  
長號涕隕闌干還坐以思慨其永歎念昔帝師為國  
死義亞傳承之夷險一致屏山雖隱亦豈忘世公襲  
其傳克廣元替衆咸謂公當訖外庸入贊皇極下釐

庶工登賢屏姦復境攘戎內繼祖考畢其餘忠天胡  
難謀而止於此羣邪交慶衆正心死矧予之哀竊究  
終始願言思公曷其有日嗚呼哀哉昔誦離騷舉公  
觴兮今拜以哭酌公堂兮私情公議兩怛傷兮神靈  
不昧尚克鑒予之哀腸兮嗚呼哀哉尚享

祭樞密劉公文

張欽夫

嗚呼哀哉六月甲子喪我元臣如其可贖何直百身  
蓋積天下之望已久而閱天下之故已深其明決足

以斷謀於俄頃而剛毅足以任重於千鈞忠誠孚于  
君心惠澤浹于斯民威名熠乎姦宄義概動乎三軍  
使之坐廟堂之上固足以厭患於未形而置之排難  
解紛之際不俟施為已足以折衝於精神國虧柱石  
人失典刑此有識之士所以為天下惜而至泣涕沾  
巾者也嗚呼哀哉忠顯之烈感乎幽明二卿之中不  
忘請纓公自壯歲念其家聲虜馬飲江扈從時巡國  
有大政抗論前陳由斯而來蔚其直稱出而典州治

本重人及其分閭潢池息兵遂登紫樞以翼政經牧  
綱端本用尊朝廷凜然正色公言是伸復牧于藩所  
至績聞抃荒之政近世莫倫旋觀設施靡薿靡禁左  
右且宜久而愈新江湖輟環幾老於行人望公歸帝  
圖厥厯豈不用公未極于成嗚呼哀哉天子知我匪  
契之云我之於公惟義是親相勉相厲期報吾君情  
深義得有同弟兄念言拜別乙未之春我車入南公  
徃江濱眷焉不舍語何諄諄豈期一濶而隔死生精



爽在目我言孰聽嗚呼哀哉義當奔走送公歸轡屬  
其拘孿王事有程哭公家塾載遣此文禮雖不豐公  
鑒其誠尚享

祭樞密劉公文

謹為位致祭于故留守觀文樞密劉公之靈惟公德  
業孚于上下威望著于華夷宜秉國鈞以輔明主天  
不慙遺人之六亡夙蒙公知尤重傷痛為位家塾慟  
哭寫哀

祭樞密劉公文

嗚呼哀哉公之云亡既踰再時匪今之悲百年之思  
故歲之冬始奉遺墨一見淚流繼之以哭墨淡行斜  
知公疲芥誦公之言則何昭晰始云國耻抱恨九原  
勉予忠義以報吾君中言先公銘志未立豈無他人  
命予以筆未復繼書囑弟及子嗟予何人乃託以死  
精爽在上耳聞公言顧雖不武敢忘勉旃銘詩脫草  
遽遣薦陳獨慚荒蕪曷詔不泯貽書平父期守公訓

告于二子罔墜厥命惟元晦君實公所敬无求于外  
惟晦是聽公之息女當擇于歸顧予雖遠願與聞之  
凡公所命當以復公薄奠是將告于公宮

祭南軒先生文

朱元晦

嗚呼自孔孟之云遠聖學絕而莫繼得周翁與程子  
道乃抗而不墜然微言之輟響今未及乎百歲士各  
私其所聞己不勝其乖異嗟惟我之與兄聰志同而  
心契或面講而未窮又書傳而不置蓋有我之所是

而兄以為非亦有兄之所然而我之所議又有始所  
共向而終悟其偏亦有蚤所同擠而晚得其味蓋繳  
紛徃反者幾十餘年未乃同歸而一致由是上而天  
道之微遠而聖言之秘近則進修之方大則行藏之  
義以兄之明固已洞照而無遺若我之愚亦幸竊窺  
其一二然兄喬木之故家而我衡茅之賤士兄高明  
而宏博我狷狹而迂滯故我常謂兄宜以是而行之  
當時兄亦謂我盍以是而傳之來裔蓋雖隱顯之或

殊實則交須而共濟不惟相知之甚審抑亦自靖而  
无愧嗚呼孰謂乃使兄終在外以違其心予亦見靡  
于斯而所願將不遂也政使得間以就其書是亦任  
左肱而失右臂也傷哉吾道之窮予復何心於此世  
也惟修身補過以畢餘年庶有以見兄於下地也聞  
兄之墓而不得臨獨南望長號以寄此酌也惟兄憐  
而鑒之尚陰有以輔予之志也尚享

祭南軒先生文

嗚呼敬夫遽弃予而死也耶我昔求道未獲其友蔽  
莫予開吝莫予剖蓋自從公而觀于大業之規模察  
彼羣言之紛糾於是相與切磋以究之而又相厲以  
死守也丙戌之冬風雪南山解袂楮州今十五年公  
試畿輔公翔禁省公牧于南我遯巖嶺顛晦殊迹心  
莫與同書疏懇惻鬼神可通公尹江陵我官廬岳驛  
騎相望音問逾數去臘之窮有來自西告我公疾手  
書在携我觀于時神理或僭是疾雖微已足深念亟

遣問訊閱月而歸叩函發書歎吒歔歔時友曾子實  
同我憂揮涕請行誼不忍留曾行未幾公計果至張  
侯適來相向反袂嗚呼敬夫竟棄予而死也耶惟公  
家傳忠孝學造精微外為軍民之所屬望內為學者  
之所依歸治民以寬事君以敬正大光明表裏輝映  
自我觀之非惟十駕之弗及蓋未必終日言而可盡  
也矧聞公喪痛徹心膺緘詞寄哀不遑他語顧聞公  
之臨絕手遺疏以納忠召賓佐而興決屢符節而告

終蓋所謂得正而斃者又凜乎其有史魚之風此猶  
足以為吾道而增氣抑又可以上悟於宸聰又聞公  
於此時屬其弟以語予用斯文以為寄意懇懇以死  
餘顧何德以堪之然敢不竭其庸虛并矢詞以為報  
尚精爽其鑒諸嗚呼哀哉

祭東萊先生文

維淳熙八年歲次辛丑九月甲戌朔九日壬午友人  
具位朱某謹以香茶雞酒奠于亡友伯恭呂兄直閣

大著郎中之靈曰嗚呼哀哉天降割于斯文何其酷耶往歲已奪吾敬夫今者伯恭胡為又至于不淑耶道學將誰使之振君德將誰使之復後生將誰使之誨斯民將誰使之福耶經說將誰使之繼事記將誰使之續耶若我之愚則病將孰為之箴而遇將孰為之督耶然則伯恭之亡曷為而不使我失聲而驚呼號天而慟哭耶嗚呼伯恭有著龜之智而處之若愚有河漢之辨而守之若訥曾有雲夢之富而不自多

詞有黼黻之華而不易其出此固今人之所難而未足以議兄之彷彿也君乃孝友絕人而勉勵如弗及恬淡寡慾而持守不少懈盡言以納忠而羞為訐秉義以飭躬而耻為介則若古之君子尚或難之而吾伯恭猶欲然而未肯以自大也蓋其德宇寬洪識量闊廓既海納而淵澄豈澄清而撓濁矧涵濡於先訓紹文獻於厥家又隆師而親友極探討之幽遐所以稟之既厚而養之深取之既博而成之粹宜所立之

甚高亦无求而不備故其講道於家則時雨之化進  
位于朝則鴻羽之儀造辟諫謨則宣公獨御之對承  
詔奏篇則左尹祈昭之詩上方虚心而聽納衆亦注  
目其專施何遭時之不遂遽縈疾而言歸慨一卧以  
三年尚左圖而右書間逍遙以曳杖悅沂上之風雩  
衆咸喜其瘳異卒摠其素蘊不則傳道以著書抑亦  
後來之程準何此望之難必奄一夕以長終增有邦  
之殄瘁極吾黨之哀恫嗚呼哀哉我實无似兄辱與

遊講摩深切情義綢繆粵前日之枉書尚粲然其首  
筆始言沈痼之難除猶幸死期之未即中語簡編之  
次第卒誇草樹之深幽謂昔騰牋而有約盍今命駕  
以來遊欣此昔之可懷凜訃車而偕至考日月之幾  
何不旦暮之三四嗚呼伯恭而遽死耶吾道之衰乃  
至此耶既為位以泄哀復緘辭以寓奠異嗣歲之有  
間上前言之可踐嗚呼尚饗

祭東萊先生文

周必大

嗚呼伯恭河嶽之英公卿之裔躬蹈五常心潛六藝  
學富而醇文敏而麗通今不流博古不泥高明之識  
力去其蔽卓絕之行亦矜其細佗人有一自足名世  
惟君兼之夫誰能僂蟬聯簪紱芥拾科第堂堂申公  
謂且能繼皇心是嘉召寘班綴成均博約館閣榮滯  
南宮表章史觀凡例主盟斯文每食忘濟風淫末疾  
乘厥勞勩歸哉毫祠可以自憇鑽堅仰高講習彌勵  
曾不息黥曾不補劓竟隕其生壽夭誰制萬斛之舟  
江湖期濟觸石而傾未皇鼓柁千年之木梁棟可計  
遇風而摧乃委薪桂才也何多命也何戾生徒滿門  
相向雪涕搢紳諸儒咸惜其逝矧伊鄙夫辱在交契  
姓不同耳心即魯衛易簣莫親臨穴莫際寓辭西風  
揮此衰淚嗚呼哀哉尚享

祭東萊先生文

辛弃疾

某官天資之美道學之粹操存之既固而充養之至  
一私欲未萌於心極萬變不足以移其至故不力而

勇甚和而毅泯愛憎以無迹更敦譽而一致宜君上  
益信其賢而同異者莫得窺其際也任重道遠發軔  
早歲遺外形躰輟寢忘寐事物之來若未始經吾意  
迨夫審是決疑則精微正大中在物之理而盡處物  
之義私淑諸人固已設料不拒聞者心醉道者志得  
抑將使羣才並用而衆志成遂也乃若生長見聞人  
物門地高文大冊博覽疆記雖皆過絕於人要之蓋  
其餘事厥今上承伊洛遠泝洙泗僉曰朱張東萊屹

鼎立於一世學者有宗聖傳不墜又皆齒壯而力強  
夫何南軒亡而公病廢上方付公以斯文謂用究其  
猶未傳聞有瘳士夫增氣忽反袂以相吊驚郵傳於  
殄瘁嗚呼壽考之不究德業之未試室無人而子幼  
何福善而如是然而天所早與者其得抑多矣又奚  
有於喬松之年趙孟之責某半世傾風同朝託契嘗  
從遊於南軒益公於而敬畏茲物論之共愠寧有懷  
於私惠緘沈辭於千里寓哀情於一酌尚享



祭東萊先生文

葉適

語何必深論不欲極使人心而有止則雖言而寧默  
緬道術其難知超聖賢之獨得雖經籍之具存蓋不  
存之莫測昔余之於公也年有長少之序輩有後先  
之隔每將言而輟止意遲遲而太息今余之於公也  
喪前路之鄉導廢旁觀之軌則縱欲言而誰聞恨冥  
冥而不白人才兮離合世道兮開塞彼蒼蒼之吉凶  
竟無所考兮余亦安能至此而不惑也紹興以來聞

卑見陋士失常心顛錯昏晝非無豪傑力止自救公  
以生稟之資世家之舊備義理於一身講源流於徧  
扣既徹牖以並約亦隨才而獨秀由是東南之失拔  
起林岫為英為哲繼公之後如雷雨之先物咸穎發  
而苕秀流蘋藻以萼擷潔黍稷而饋餽嗚呼公之施  
於世者止此而已至于不以記醜為博不以文多為  
富器不止於一能學不期於徧就事欲析而愈精德  
欲充而兼冒暢羣儒之異指續光民之遺自周孔之

業散而不述禹湯之功息而不奏若干載之有待又  
一朝而永謬疑古人之皆然儻今人而何咎恃哭泣  
之可忍徒薦哀於此酌尚享

祭東萊先生文

嗚呼才難之嘆豈謂凡才治不如古亦云久哉思得  
一人庶幾於此才非不多未知孰是必有學窮本原  
行窮根柢古今貫穿而守之以約規模宏大而不遺  
其細議論正平而得事幾之要人物兼取而無愛憎

之累表裏如一俯仰無愧若人者夫然後退可以為  
後學之師表進可以居朝廷之大位覲斯民之小康  
抑吾道之不墜惟公其人歟胡為乎抱道而不得試  
嗚呼天之生公亦甚難而不易賦之德而嗇其壽誘  
其衷而不使伸其志蓋天子欲用而公已病病不可  
以有為矣卧家優游尚足以矜式於一時何疾因之  
夙昔而逝嘆此數年凋喪善類天乎天乎又奪吾大  
賢是真可為痛哭流涕者某公等登公之門嘗聞餘

論之一二顧平時師仰之不暇者何敢知公之所至  
詩不云乎人之云亡邦國殄瘁抑公其人也相與設  
奠而哭以斯文茲豈曰吾徒之私意也耶嗚呼尚饗

聖宋名賢五百家播芳大全文粹卷百三十四終

